

# Onn intensiv per la Spitex Selva

Gievgia ha la suprastonza dall'uniun Spitex Selva envidau alla radunonza annuala. La purtadra dalla tgira ed assistenza a casa per las vischnauncas da Falera, Flem, Laax, Sagogn, Schluein e Trin ha giu in onn 2021 intensiv. Varga 22 000 uras prestadas ei in niev record ella historia dall'organisaziun.

AUGUSTIN BEELI/FMR

Ilis dus onns vargai ha la radunonza generala buca giu liug per motivs enconuschents. La suprastonza ha envidau da prender posiziun a scret pertuccont quen annual. Gievgia ha il president dall'uniun Spitex Selva, *Gion Albert Coray*, puspei astgau beneventar commembras e commembers ella fuorma usitada. «Quei ha munciau a nus ils dus onns vargai, nus apprezziain quei contact persunal», ha el manegiau. En tut dumbra l'uniun-purtadra 255 commembras e commembers. Igl ei confamgliars, clientella e simpatisants, semplamein glieud che appreziescha e vul sustener la lavur dall'organisaziun. Ilis survetschs che quella presta ein pli dumandai. Quei ha la menadra operativa, *Anni Adam-Cahenzli* cumprovau. «Varga 22 000 uras havein nus registrau, quei ein 18% dapli ch'igl onn precedent, igl ei in record absolut», ha ella informau ils presents. Entschiet ha la Spitex Selva gl'onn 2001 cun 8284 uras da tgira ed assistenza. 20 onns pli tard eis ei exact 22 252 uras prestadas.

## In territori, en duas regiuns da sanadad

La Spitex Selva ei la suletta organisaziun el Grischun che lavura sur duas regiuns ora. Amiez quei territori va il cunfin politic respectiv la regiun da sanadad. Quater vischnauncas ein attribuidas alla Surselva e treis al Plaun/Imboden. Gion Albert Coray ed Anni Adam han puntuu ch'ins vegli cun tuts micds mantener quella structura sùrregionala, ella fetschi senn, seigi secumprovada e la lavur funcziuneschi a cumpleina cuntentientscha da tuts. «Negin ha interess che quei semidi», ha Anni Adam gett en preschientscha dils presidents communal e representants dallas vischnauncas-purtadras.

La clientella dalla Spitex Selva giavischass il pli davos ch'ei semidass zatgei vid quell'organisaziun surveseivla e persunala. Ch'il menaschi ei perquei tuttina sesviluppau, ha la meinagestiun era menziunau en siu rapport. Il diember da persunal ei carschiu sin varga 40 persunas che partan pensums da 10 tochen 70% d'in total da 18,1 piazzas cumpleinas. «Disponer quei persunal e far ils plans da lavur ei vegniu pli preten-



La suprastonza cul president partent e la meinagestiun, da sen. Anni Adam, Jean-Marc Rietmann, Toni Arpagaus, Gion Albert Coray, Andrea Montalta, Maria Mongili Darms, Prisca Coray e Fabiola Caduff.

FOTO AUGUSTIN BEELI

sius. Jeu sentel denton tier tuttas collaboraturas gronda motivaziun e loialitad», ha la meinagestiun confirmau. Avon diesch onns prestava il persunal dalla Spitex Selva ella media 35 accziuns a gi, gl'onn 2021 eis ei stau 80 a gi.

## Survetschs da tschaveras e viadis

Las endisch specialistas da tgira, treis specialistas da sanadad, ina tgirunza da casa, 13 gidontras da tgira, tschun gidontras ed in gidonter da casa ein stai gl'onn 2021 en accziun per 246 clientas e clients. L'organisaziun ha recepitu 136 novas persunas e terminau 115 cass. La meitadad dallas persunas ein puspei serestabilidas, 12 ein entradas en casas da tgira, las ulteriuras han giu dad ir en clinicas, han midau domicil ni han confamgliars che assistan ad els. La Spitex Selva porscha era ils survetschs da tschavera cun voluntaris. 32 tals han purtau a 74 diversas clientas e clients 9053 tschaveras.

Voluntarias e voluntaris han unfriu 1110 uras ed ein carrai 30 327 kilometers. Pil survetsch da viadi ein medemamein 52 voluntarias e voluntaris stai en accziun. 554 gadas han quels carrai clientas e clients tier miadis, per terapia ni el spital. Da niev ha la Crusch cotschna svizra sezza surpriu la disposiziun da quei survetsch.

Onn vargau ha ei dau midadas ella suprastonza. *Rita Holdenet*, Sagogn, ed *Astrid Furrer*, Flem, han bandunau la suprastonza. Per els ha la radunonza a scret elegiu onn vargau *Jean-Marc Rietmann*, Trin Digg, e *Maria Mongili Darms*, Sagogn. Els ein sepresentai alla radunonza, medemamein ils nievelegi da Laax e Falera, *Prisca Coray* e *Toni Arpagaus*.

*Gion Albert Coray* ei sortiu salenter esser stau 13 onns president dalla Spitex Selva. Sco sia successura ha la radunonza elegiu *Andrea Montalta*, Schluein, ella fageva gia part dalla suprastonza.